

Ta reina trankilidad y estabilidad atrobe den e aerolinea

Empleadonan di Aruba Airlines a celebra sentencia di Corte



ORANJESTAD (AAN): Riba diaranson dia 2 di maart 2016 Corte a tuma un decision den e caso di Aruba Airlines y a apunta Esteban Valles como director interino di Aruba Airlines y a suspende Onno De Swart di tur funcion cu e por tin den Aruba Airlines. Den oranan di atardi e gerencia di Aruba Airlines a yama un reunion cu tur empleado pa informa nan di e sentencia y a presenta Valles back na cabes di e aerolinea. E caso a cuminsa ora Onno De Swart a dicidi di haci un "Hostile takeover" door di yama un reunion di accionista y hunto cu Gabri De Hoogd a dicidi di duna e compania "Black Brothers" 1.001 accion. Esaki lo trece cune cu Seastar Holding NV cu tin 90% di accionnan lo keda cu 9% di accion y e ora no tin nada mas di bisa. E decision aki ta invalido pasobra e ta contra statutonnan di e compania. Durante e tratamiento di e caso De Swart y De Hoogd ya a admiti cu e decision tabata invalido. Hues a ratifica esaki cu ta trece cune cu Seastar a keda accionista mayoritario cu 90%.

Tur e maniobra di Onno de Swart a pone cu el a bay mucho leu y cu ta logico cu Seastar no tin confianza mas den

De Swart y Huez a suspende De Swart den tur funcion cu e lo tabatin den Aruba Airlines. Tambe Hues a dicidi cu De Swart no mag di ta activo den Aruba Airlines y cu e mester duna tur su cooperacion na Valles y pasa tur informacion pa e director nobo. Si Onno de Swart no cumpli cu e decision di Hues, e lo haya un boet di Afl. 25.000,= pa dia cu un maximo di Afl. 25.000.000,=.

Consecuentemente Corte a dicidi tambe di apunta Valles como director interino. Hues ta di opinion cu e accionista mayoritario tin confianza den Valles y segun e statutonnan di Aruba Airlines e accionistanan ta nombra e director. Kiermen, cu desde 2 di maart Valles ta director interino di Aruba Airlines y Hues a autoris'e pa haci e cambio necesario na Camara di Comercio. Cu e decision di Corte, awor Seastar tin tur control back como accionista mayoritario di Aruba Airlines y Esteban Valles a bira director. Esaki ta trece trankilidad pa Aruba Airlines y nan em-

pleadonan. A funda Aruba Airlines dia 31 di januari 2006 pero a realisa su prome vuelo dia 31 di mei 2013. E compania Arubiano tin su oficina principal situa na Cumana 69 aki na Aruba pero cu oficinanan di representacion na Panama, Miami, Venezuela, Corsou y Santo Domingo. Aruba Airlines ta bula cu avionnan nobo y moderno, Airbus A 320-200 cu un capacidad di 150 pasahero, parti den 12 pasahero Business Class y 138 den Economy Class. Nan tin un total di 300 empleado stationa na tur nan oficinanan den tur nan mercadonan. Na Aruba so tin 139 empleado den servicio directo.